



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

Tir Murmu-i Angola aser Botswana
na semdangtsü apusoa ogo

US sorkar ketdangsürtem G20
summit nung madentsü: Trump

VOL. XXIII ISSUE NO. 33 (ADOK 33) DIMAPUR AMUNGNÜ (SUNDAY) YIMPOKSÜI (NOVEMBER) 09, 2025

₹ 5.00

Birla-i Kohimanung mungdang lapoktsütsü

Dimapur, November 8, 2025 (TYO): Lok Sabha Speaker Om Birla-i November 10, 2025 nü Kohima nung Commonwealth Parliamentary Association (CPA) India Region Zone-III indang 22 buba Annual Conference tenzütsütsü.

Iba sentong nung Chief Minister Dr. Neiphiu Rio, Rajya Sabha Deputy Chairman Harivansh aser Legislative Assembly Speaker & CPA India Region Zone-III Chairman Sharingain Longkumer nung adentsü.

November 10 aser 11, 2025 anogo ananü mungdang nung CPA India Region nung Zone III nungi Presiding Officers, MPs aser MLAs adentsü. Iba Zone nung Northeastern region nungi state 8 dena lir.

Iba mungdang atema omenji "Policy, Progress & People:

Legislatures as Catalysts of Change" lir.

Maneni, sub-themes ji "Role of Legislatures in Achieving Viksit Bharat" aser "Climate Change - In the Light of Recent Cloudbursts and Landslides in Parts of the Northeast Region" lir.

Mungdang tembangba sentong nung Rajya Sabha Deputy Chairman Harivansh-i o jembitsü. Maneni, Meghalaya Legislative Assembly Speaker & Vice Chairman, CPA India Region Zone-III Thomas A. Sangma aser Nagaland Legislative Assembly Deputy Speaker S. Toiho Yeptho natia o jembitsü.

CPA India Region Zone III ajanga regional cooperation nung tongti shilem agia aruogo. Northeast Region nung tongtipang mapa inyaktetba rongnung ASEAN Vision for Trade and Cooperation lir.

JCC-i state sorkar dang pelar; Nangzükba ama inyaksü nenshir

Dimapur, November 8, 2025 (TYO): Sorkari IAS induction nung Non SCS quota dendaktsüba Panel List meyipa agitsü aser meritocracy tangatetba nung inyaksü lemtetba atema pelar ta CANSSEA, FONSESA, NIDA, NSSA aser NF&ASA ajanga tentetba Joint Coordination Committee (JCC)-i metetdaksüogo.

Sorkari NPSC clause meyipa bener arua meritocracy nung ajemdaker nübotem shimoktsü aser sendaktepa alir ajak den asündangteper ang IAS nung Non SCS shimoktsü nangzükba atema

pelar ta JCC-i sangdong ka nung ashi.

Sorkari Panel List agienba indang cancellation letter ka tekaratiba nung JCC ket nung agütsütsüla aser IAS nung Non SCS shimoktsü atema eligibility criteria ka lateta ayutsüla ta parnokisa metetdaksüogo.

JCC ajanga akhangba onük tongtipangtem langzüogo ta ajiteta lungkak aitba sentong anenogo. Ajsüaka sorkari nangzükba ama meinyakra JCC-i özüngi melaba ama lungkak aittsüsa akümtsü ta Media Cell, JCC sangdong ka nung ashi.

Centre aser Kuki-Zo teloktem Delhi nung olemtep

New Delhi, November 8, 2025 (Agencies): Ministry of Home Affairs (MHA)-i November 6 aser 7 anogotem New Delhi nung Suspension of Operation (SoO) agreements kübok aliba Kuki-Zo telungpur teloktem den olemtepogo. MHA-i Kuki National Organisation (KNO) aser United People's Front (UPF) teshimtet nübotem den ajurutepe senden amen aser idangji Legislative Assembly dena Union Territory ka kümtettsü takhangba benoka lemsatop.

Kuki-Zo political aser armed leadership tenüng nung KNO aser UPF lennirtem iba senden nung aden. Külen Advisor (North East), MHA A.K. Mishra-i Centre tenüng nung shilem agi.

Mezüng anogo nung MHA, Manipur sorkar aser SoO groups tsüngda September 4 tripartite agreement indang jembi.

Kin o kin tsüngda rara adokba sülen Kuki-Zo nung aliba tesemtem nung ketdangsübaren aser law & order mali kümogo ta Kuki-Zo teshimtet nübotemi ashi. Parnokisa security aser terenlok atema ketdangsübaren balaka meshi.

Tanabuba anogo nung Kuki-Zo nung Union Territory with Legislature meshiba indang jembi.

Tang Manipur state

administrative structure kübok külemi lia moutettsü aser iba ya May 3, 2023 nungi tenzüka kin ka samatsütsü merangba ajanga lir ta Kuki-Zo lennirtemi ashi.

Independence matongdang Kuki-Zo Hills ya kodanga Manipur State Durbar kübok maliasü aser Government of India Act, 1935 kübok "Excluded Area" nung dendaktsü aser Meitei yimli kübok masü saka British Political Agent ajanga indangindanga ketdangsüa aru ta Kuki-Zo lennirtemisa ashi.

Kuki-Zo nungeri pre-Independence autonomy akhang aser iba ya telemsa adoktsü atema masü saka Indian Union telongtet nung ketdangsübaren aser terenlok atema lir ta parnokisa ashi.

"Centre-i Kuki-Zo nungeri tebilemstütem atema süoki ia bilemer saka tang Government policy ajanga Union Territory tasentem kümteta aotsüba pusema menungiter. Anungji ketdangsübaren melenshütsü atema tamasa Manipur nung kin ajak den asündangteptsü" ta A.K. Mishra-i ashi.

Centre-i khen bilemdangtsüla aser Kuki-Zo nung taküm, ali aser rongsen kümzüka ayutsü atema constitutional inyakyim kar benoktsüla ta KNO aser UPF lennirtemi ashi.

NPCC-i 'Vote Chor, Gaddi Chhod' campaign asoshi signatures lakh 2 tema benden



NPCC Working President Khriedi Theunuo & Lok Sabha MP S. Supongmeren Jamir tenati osangbener den jembi noks nung angur

Kohima, November 8, 2025 (TYO): Nagaland Pradesh Congress Committee (NPCC)-i All India Congress Committee's (AICC) "Vote Chor, Gaddi Chhod" campaign kübok signatures 2,08,000 bendenogo.

Iba campaign ya clean elections ajungkettsü aser osang prokshitsü atema linük ajungalen agir.

"AICC-i signatures 1.5 lakh bendentsü alizüing ayu saka NPCC-i District Congress Committees (DCCs) 12 nungi signatures 2,08,057 tashi bendena ajatetogo" ta NPCC Working President Khriedi Theunuo-i ashi.

Kohima nung signatures 72,000 teimtiba benden aser iba sülen Dimapur nung 50,000 aser Mon nung 20,000 bendena liasü.

Maneni, Tuensang nung signatures 12,439, Zunheboto

nung 12,4000, Mokokchung nung 10,000, Peren nung 6,500, Wokha nung 6,400, Longleng nung 5,038, Kiphire nung 5,000, Phek nung 4,524 aser Noklak nung signatures 3,120 bendenogo.

NPCC ajanga bendenba signatures ya AICC headquarters, New Delhi dangi yoktsü aser iba sülen Congress high command-i India President dangi yoktsü ta Theunuo-isa metetdaksü.

Linük nung ruling BJP aser parnok den yaritepba teloktemi vote tim mesüi amshiba anema iba campaign ya linük ajungalen agir. 'Vote Chor, Gaddi Chhod' campaign ya democratic awareness movement ka lir ta Theunuo-isa ashi.

Maharashtra, Madhya Pradesh, aser Haryana nung tawa elections agiba nung votes tim mesüi amshiba ajitetogo. AICC

ajanga iba atema RTI ka agütsüba nung Bengaluru kübok Parliamentary constituency ka nung taitsü aketba voter lakh ka tema puteta liasü. Iba nung ajemdaker 'Vote Chor, Gaddi Chhod' campaign tenzüka ta paisa ashi.

"Party ketdangpurtemi state-wide signature drive takok ngua agiba atema tenüngsang agütsür" ta NPCC President & Lok Sabha MP S. Supongmeren Jamir-i ashi.

"Onoki mezüng nükjidong ayubaji teküpoktiba jenjang nung alirtem atongtsüba aser clean election nung temulung agütsütsüba liasü. Iba campaign ajanga Congress-i 2028 Assembly elections atema mapa tenzüker" ta Supongmeren-isa ashi.

Congress-i clean election atema noktaksü aser linük nung sorkar ketdangsübaren nung tim masüba tuteta sayutsü ta paisa ashi.

"Onoki kijatem anema masü saka nübotem anema policies aser programmes anema noktaksü" ta Supongmeren-isa shisem.

"Iba signature campaign ya Congress pusemertem atema dang masü saka pei senti vote apayurtem ajak atema lir. Iba ya vote tim mesüi amshiba anema lir" ta pai metetdaksü.

"India President-i linük nung alirtem nem temeten agütsütsü imlar" ta NPCC Working President Khriedi Theunuo-i ashi.

P. Shilu Ao nüngtem nung lipuyimpur saisabong ayongzük

Mokokchung, 08 November (TYO): "Tenten" omen dak rangloker mezüng Nagaland Chief Minister asür P. Shilu Ao bilemteta lipuyimpur (indigenous) saisabong benjong den repsema tanabuba ar atsütepba (tug-of-war) tetoktepba sentong Nov 7 & 8 anogo ananü Longjang yimdak kanga longsoa mungogo. Iba sentong ya Longjang yimden aküm nung Longjang Riongjanger Cultural Society, Mokokchung-i ayongzük.

Anogo ananü agiba sentong nung akhi asen tsüraburtemi asaya-a aruba saisabong balala asayaba den tsürabur yimya nung yartsüngsang, kentenmenü, saya balala den tetoktepbatem liasü. Meyuo, Jangtok, Noksen Malo, Keling Asa Sayiba, Sungpang Tsüktep, Surempang, Entipong Metsütep, Ao Tsüktep, Nochu, Ami Tsüngtep aser asaya tapu balala saia liasü.

Tanü iba sentong nung Longjang lushi den arsema alir yim ter (10) - Longpa, Süngratsü, Khar, Mongchen, Dibua, Waromung, Asangma, Kilengmen, Mongsenyimti aser Chuchuyimlang nungi yimsüsüri

anir lenla tabensa nungi arua shilem agia liasü. Ar atsütepba tetoktepba nung Longjang o Sungratsü na final asayaba, Longjang teloki koka taküm 2nd Tug-of-War Championship 2025 takok marok parnoki benogo. Takoker nem senpet sen den trophy agi senpettsü.

8th Nov nü sentong lapoktsür MLA & Advisor, Water Resources, Tongpang Ozüküm-i jembidang, tsürabur P. Shilu Ao ya par külem zünpur taküm alirtemi ashiba agi, tasütait, tangar dang nungi khenyongi balaka chirapera aketba nisung aser jembishinüba nunga tsüngru tasong liasü ta ashir, pa ama sempetjep aketba nübu Naga nung ar aika soteta mali, ta tangari kuli agütsüba ka pai metetdaksü.

Nagaland statehood mangudang Interim Body ka tentet aser yangji council member 45 shim (Interim body 1961 - 1963), yangji pa tokolakba liasü. 1963 nung statehood ngur 1964 nung mezüng Nagaland Legislative Assembly election agia pa mezüngbuba Chief Minister shimtet. Par tendak alima tensa tia kanga mesüngjemi liasü, anungji,

pai CM mapaji küm 2 sür ita ishika dang aben aser pa iba menden nungi anentsüsa kümatok. Pai mapang tatsüka dang benaka iba mapang telungpur den yimjung kishi lapokba maparen tenzüka aser par mapang sarkar yimsüsüba aser terenlok mapa nükm tenzüka yutsüba tanü asenoki iba süngjang achir, ta Tongpangi ashi. Pa dak sempet tajung ajiteta India sarkaria pa nübu amshiba Nagaland otsü nung tejangja lir, ta paisa shisem.

Pa amala lenir kaji yimeri dang masü, Ao kin aser Naga nung ar ajungai akümtsüba tushitsü tim. Iba benjong ya tang dang nungi tajungba aser tuluba ayongtsüsa nükjidong südaksünür, ta paisa ayongzük. P. Shilu Ao nüngtem Mokokchung nung tang koba park ka yangludaki, iba mapa inyaksü shibai shisatet parnok nem tenüngsang agütsür. Nagaland nung mezüng CM ji ka dang lir aser aji P. Shilu Ao lir, pa nüngtem park yanglubajia pa dak langa lir saka ano iba dang mapa tuluba inyaksü tim, anungji, iba asoshi asenok ajak khuret südi, ta pai shisem.

(Maneni tapak 8 nung...)

Nagaland Flatfenders Club Foundation Day amung



CT Square, Chumoukedima nung Advisor to Chief Minister aser IDAN mendenbuba Abu Metha den tanga ketdangsürtem aser Nagaland Flatfenders Club züngsemtem NFC foundation day sentong nung shilem agiba mapang tangokba noksa nung angur. (CT Square, Chumoukedima, Nov. 08, 2025)

Dimapur, Yimpoksüi/ November 8 (TYO): Nagaland Flatfenders Club Foundation Day November 8 nü CT Square, Chümoukedima nung mungogo. Iba sentong ya Youth Director, Police Baptist Church, Chümoukedima Imlimenba-i sarasademer tenzük, aser iba sülen Nagaland Flatfenders Club Tir T. John Longkumer, IPS (Retd.)-i lokti pela agizükba o jembia liasü. Pai 2020 küm iba club amenokba sülen club inyakyim aser takoktem indang lemsatep.

Sentong nung o jembiba mapang Advisor to the Chief Minister aser IDAN mendenbuba, Abu Metha-i, küm pongu renteta takok nung aruba atema Flatfenders Club nem tenünsang agütsü, aser Chief Minister, Dr. Neiphiu Rio-i club mapa tajung asoshi tenünsang agütsüba lemsatepa liasü. Paisa, puti otsü aser senmang wazüka ayuba aser talisa World War II garitem wazüka ayutsü atema

club-i tongtibang shilem agiba indang lemsatep aser ashiba agi, item garitem yagi Second World War mapang dang masü saka rara tembangba sülena teyari agütsüogo aser item garitem ya alima kübok tesem balala nung senziusenpongsü atema kanga tongtibang aküm.

Pai club züngsemtem dang international club tem den sendakteptsü atema restoration, capacity building dak sendakba nung workshop tem ayongzüka agitsü aser parnok sabang ya international jenjang nung Nagaland ajungkettsü atema amshitsü, Naga nungertem ajungkettsü aser alima nem Nagaland indang otsü tajungtem metetdaksütsü ayongzüka liasü.

Kasa mapang nung Imnalensa, IPS, DIG (Border), Chümoukedima-i, gari tejen kiburtem nem parnok gari kanga junga yanglushia tesüiba mapang den sendakteptsü asoshi item ya wazüka ayuba

atema tenünsang agüja liasü. Paisa, item garitem yagi, temulung lemsü aliba, tia tensa ajak koktetba, masetshiba aser tongmelang yimyatem sayur, koba ajaki benshitsü merangtsüba yimya tajungtem lir, ta ashi. Maneni pai Flat Fenders Club dang item garitem indang puti otsü mangaoka ayutsü ajungshia liasü.

Sentong nungsa Alice K. Vizo, IPOS, Director, Postal Services, Nagaland Division, aser Chairman, Sovima Village Council, Sebastian Zumvu nungeria o tatsütsü jembia liasü.

Sentong ya Nagaland Flatfenders Club Secretary General Dr. Andrew Aphoto-i tepela o jembir tembang liasü. Sentong nung gari meimertem, ketdangsürtem aser lokti tentet balala lenirtemi shilem agia liasü. Vintage cars, Willys Jeep den World War 2 memorabilia tem stall balala nung saya liasü.

Pungro nung District level Padayatra sentong agi

Dimapur, Yimpoksüi/ November 8 (TYO): District level Padayatra sentong November 7 nü Government Higher Secondary School, Pungro nung takok ngua agiogo.

Iba sentong ya Ministry of youth affairs and sports, GOI aser district administration na longjemer ayongzüka agia liasü.

Sentong ya Sardar Vallabhbhai Patel sor küm 150 ajungba mapang pa taküm aser pa mapa tushitsü nükjidong nung ayongzüka agiogo.

Sentong nung o jembiba mapang ADC Pungro Neilizo Tep-i, Sardar Vallabhai Patel (Iron man of India) taküm aser

pai mapa tajung inyaka toktsüba indang lemsatep. Kasa onük dak ajemdaker Kishore Dulam, District youth officer, Kiphire-ia sentepa aliba lokti ayongzüka liasü.

Sentong nung linük ken atenba den Government Higher Secondary School, Pungro kaketshirtemi naro agi tetushi agütsü, aser sobaliba sentong balala saya liasü.

Sentong ya ADC-i Padayatra tenzüksüba sülen Government Higher Secondary School, Pungro nungi ADC office, Pungro tashi unity March sentong ka agiba sülen tembang liasü.

Omai Rebecca Konyak nem Miss Mon korang agütsü



Dimapur, Yimpoksüi/ November 8 (TYO): Konyak Nyupuh Sheko Khong (KNSK) aser Miss Mon Committee nati longjemer ayongzüka Miss Mon 2025 pageant Tobu Unit nungi Omai Rebecca Konyak-i kokogo. Iba sentong atema Beauty and Aesthetics Society of Nagaland-i teyari agüja liasü.

"Celebrating Elegance, Grace & Confidence" omen nung ajemdaker tetoktepba ya Town Council Hall, Mon nung November 7 nü agia liasü. Iba tetoktepba nung KNSK kübok unit 16 nungi aiür chanutemi shilem agia liasü.

Iba sentong nung Global Naga Forum Co-Convenor Prof. Rosemary Dzuwachu alakteta jaoker liasü aser Miss Nagaland 2024, Anon Konyak-ia shilem agi. Maneni sentong

nung Shelao Kheang Konyak-ia shilem agi.

Tobu Unit nungi Omai Rebecca Konyak-i tetoktepba akok aser Chen Unit nungi Ngamya P Konyak aser Kohima Unit nungi Ngaplii Wangha na tanabuba aser tasembuba jenjang nung liasü.

Subtitle Award angurtem: Miss Multimedia: Meilem M, Wakching Unit
Miss Talented: Neangmai, Tobu Unit

Miss Congeniality: S. Yingjong Konyak, Naginimora Unit
Miss Photogenic: Ngipwan Angha W Konyak, Mon Unit

KNSK aser Miss Mon Committee nati sentong nung shilem agirtem, sponsor tem aser iba sentong nongita yarirtem ajak dang iba sentong takok asoshi kanga pelaba lemsatepa liasü.

17buba CRM National Health Mission debriefing sentong agi



Dimapur, Yimpoksüi/ November 8 (TYO): 17buba Common Review Mission (CRM), National Health Mission debriefing sentong November 7 nü Hotel Vivor, Kohima Conference Hall nung agiogo.

Sentong lenisüba mapang Mission Director, National Health Mission (NHM), Nagaland Dr. Keveduyi Theyo-i, CRM team-i tongutetba aser temelenshi atema benokba onüktem Department-i pelashishia agizüker aser team-

i tetuteta sayuba metongmejentem bentettsü atema inyaktsü ta ashi.

CRM team-i anogo trok atema state semdangba sülen parnoki ngutetba tem metetdaksüba den tinyaktsü nüngdaka alibatem benoka liasü. Anogo trok tsüngda parnoki District Hospitals densema Zunheboto nung Health facility 12 aser Mon nung 13 semdanga liasü. Deputy Commissioner, National Urban Health Mission Division, MoHFW, New Delhi Dr. Sushil

Kumar Vimal-i, state nung Health Sector nung lokti-i shilem tajung agiba atema tenünsang agütsü aser iba den CBO, tamangba yimsü lokti tentettem, NGO aser yimtsüng nung tekolaktemi, infrastructure, hadir balala, furniture aser health unit tem anepalutsü atema tenla tajung agütsüba den nübu tenla a shilem agiba tenünsang sanga liasü, koba state indang tashi tulutiba ka ta ashi.

Dr. Sushil-isa, state nung health services junga lir saka infrastructure junga maliba ya

tetsükdaktsü tulutiba rongnung ka lir, ta ashi. Pai, longrelongbang agi sünga aliba ajanga tesem aika tonga aotsü tasak asüba den lenmang majungba, mobile aser internet connectivity meliaka nüburtem nem health service balala agütsütsü atema takok tashi tajungtiba inyakago, koba tenüng asangtsü langa lir, ta ashi.

Parnoki ngutetba rongnung ken o junga masadangi mapa inyaker yokba, paramedical manpower atema training tali nüngdakba, MoHFW nungi senotsü menor agizükba ajanga itasen agütsütsü menoba, Health worker temi kinük nung aliba tesemtem nung inyaktsü memulungba densema lir.

Team-isa, comprehensive HR Policy ka yanglutsü, kinük nung aliba tesemtem atema incentivizing manpower bushidangtsü, beneficiary tem sen entokba tajemba kümdaktsütsü atema inyaktsü aser mozü rezünga ayutsü benoka liasü.

Sentong nung melepzüng o

jembiba mapang Commissioner & Secretary, Health & Family Welfare, Govt. of Nagaland Anoop Khinchi, IAS-i, district ana semdangba mapang CRM team-i kanga nendaka inyakba atema parnok nem tenünsang agütsü. Paisa, CRM-i benokba onüktem ya Districts ajak atema SoP ama state-i agitsüla ta ashi. Anoop-isa, health workers tem incentivize asütsü benokba pelashishia agizük aser health care jenjang tajung agütsütsü atema National Quality Assurance Standards sülen anidaktsü atema rangloker inyaktsüla ta ashi.

Kasa mapang nung Principal Director, DoHFW Dr. Mereninla Senlem-i tepela o jembiba mapang, CRM-i parnoki ngutetba aser tebilemba tajung lemsatepba atema kanga pelaba lemsatep, koba lai ashiba agi, health care delivery system akangshitsü atema guideline ama amshitsü.

Common Review Mission nükjidongji NHM benokba asadangtsü atema lir.

Tir Murmu-i Angola aser Botswana na semdangtsü apusoa ogo



November 08, 2025 nü Tir, Droupadi Murmu New Delhi nungi Angola-i apusoa aotsü mapang tangokba noksa nung angur.

New Delhi, November 08 (Agencies): Tir, Droupadi Murmu-i Angola aser Botswana na semdangtsü atema Honibarnü New Delhi nungi apusoa ogo.

Africa region nung aliba linük ana denji tesendaktep yanglutsü aser amalitepa inyaksü asoshi maongka tasen bushitsü nükjidong nung lai anogo troknü tsüngda linük anaji semdangtsü.

Tang mezüng India Tiri kati linük ana ya semdangtsü.

Murmu-i mezüng Angola yimtiba, Luanda semdangtsü aser November 8 nungi 11 tsüngda lai tongti ketdangsertem aika ajurua senden amentsü.

Iba sülen lai November 11 nungi 13 tsüngda Botswana yimtiba, Gaborone semdangtsü. Lai Angola Tir, Joao Manuel Goncalves Lourenco ajurua senden amentsü aser Angola

nüchiso anguba sülen küm 50 ajungba mong sentong nung adentsü.

Laisa Angola Parliament nung o jembitsü aser iba linük nung aliba India nunger sensotem-a ajurua jembitsü sentong lir.

India aser Angola na tsüngda tesendaktep yangluba sülen taküm küm 40 ajunger.

B r i h o s t i b a r n ü osangbenertem den jembidang Secretary (Economic Relations), Ministry of External Affairs, Sudhaker Dalela-i, "India aser Angola na tsüngda tesendaktep kanga junga lir aser lenla aika nung amalitepa inyaker. Asenok Angola den energy sector nunga tesendaktep junga lir," ta metetdakja liasü.

Tang Tiri linük ana semdangba ajanga item

linüktem den tesendaktep tajungba akümtsü aser ajak tajangzük angutsüsa aluyimba, health, energy, shishilembaba aser investments, technology, infrastructure terenlok aser defence sectors nung amalitepa inyakba jenjang ano tajungba akümtsü, ta pai metetdaksü.

Botswana nung Tiri Botswana Tir Duma Gideon Boko ajurutsü aser Gaborone nung aliba national assembly nung jembitsü.

"Tiri semdangba ajanga Angola aser Botswana na den India tesendaktep tajungba akümtsü aser lenla tasen aika nung amalitepa inyaksü atema lenmang lapoktsü. Ni tamalen ashiba ama, India-i Africa continent den lenla aisü nung tesendaktep tajungba akümtsü atema inyaker," ta paisa metetdaksü.

Asükwa mongpu Parliament Dec1 nungi 19 tashi amentsü

New Delhi, Yimpoksüi/ November 08 (Agencies): Asükwa mongpu Parliament December 1 nungi tenzüksü aser December 19 nü tembangtsü, ta Honibarnü Union Parliamentary Affairs Minister, Kiren Rijju-i metetdaksü.

Rijju-i X ajanga, democracy tashi aittsüsa aser nüburtem tajungtiba tenzüksüsa iba senden takok ngua kattetsü imlar, ta metetdaksü.

Iba sangdong metetdaksüba sülen mapang tatsüka tsüngda Trinamool Congress (TMC)

nungi Rajya Sabha lenir, Derek O'Brien-i, "Parliament-ophobia. Ato kilonser Narendra Modi aser pai aniba team ya 'Parliament-ophobia' ta asüba tashidak agi timtemer, iba ya Parliament tsübuba lir," ta metetdaksü.

Tesüsabuba Parliament senden taküm July 21 nungi August 21 tashi mena liasü, aser tzüngluruwa mongpu senden ya-a junga magiteti liasü.

Ita ka piyong senden nung Lok Sabha nung Bill 12 aser Rajya Sabha nung Bill 14

agizüka liasü. House anaprongla nung aiben rongrong adoka senden junga magitet. Opposition party temi Operation Sindoor onük nung o lemteptsü akhang, iba sülen Bihar nung Special Intensive Revision (SIR) exercise agiba onük nung o lemteptsü takhangba agüja liasü.

Yaküm asükwa mongpu senden nunga linük temzüng latetba sülen küm 75 ajungba nüngtem nung o lemteptsü mapang aiben rongrong adoka liasü.



November 08, 2025 nü Bihar kübok Bettiah nung election nüboyim sentong ka nung Ato kilonser, Narendra Modi agizükdang tangokba noksa nung angur.

India-i Tejas tayimtsü atema jet engine 113 alitsü tezüngzüktep agi

New Delhi, November 08 (Agencies): India-i Tejas raraba tayimtsü atema jet engine 113 alizüksü atema Hokolbarnü General Electric den tezüngzüktep ka agiogo; US den tesendaktep tera tajungba akümba mapang ka nung iba tezüngzüktep agi.

India-i raraba tayimtsü tejen aika melendokba mapang ka nung Tejas Mk-1A raraba tayimtsü ya Indian Air Force atema kanga tongtibang.

China sepaitem jenjang tajungba akümba aser China-i India tsükchir tulutiba Pakistan pusemba mapang ka nung India-i raraba tayimtsü tasen aika kanga nüngdaka kümogo.

2021 küm India-i General Electric dang nungi engine 99 manga-a liasü saka tang tashi nung engine pezü dang tongogo. Coronavirus wara sülen supply chain dak sendakba timtem balala ajanga engine supply menor, ta General Electric-i metetdaksü.

Hokolbarnü tezüngzüktep tasen ka agiba kübok 2027 küm nungi tenzüka küm pongu

tsüngda GE-i engine 113 ji agütsütsü imlar, ta Hindustan Aeronautics Ltd-i metetdaksü.

India-i Russia nunger dang nungi totzü alizükba atema US Tir, Donald Trump-i India nunger osettsüset nung saru shilem 50 atuba sülen US aser India na tsüngda tesendaktep mejungi aküm. Iba nungji ajemdaker India-ia US dang nungi defence oset alizükba anena liasü.

Taoba ita Trump-i, India den tekeraba nung shishilembaba dak sendakba tezüngzüktep agitsü imlar, ta metetdakja liasü.

Brihostibarnüa Washington nung osangbenertem den jembidang Trump-i, sangküm pai India semdangtsü tebilemba lir, ta metetdakja liasü.

Taküm Quad senden nung adentsü atema Trump-i India semdangtsü liasü saka taoba ita Australia Ato kilonser, Anthony Albanese-i, Quad senden ya sangküm küm tetenzüklen ang ayonga akatsü, ta metetdaksüogo.

Quad tentet nung züngsem linük pezüji Australia, Japan, India aser United States lir.



November 08, 2025 nü Kadwa, Bihar nung Congress MP, Priyanka Gandhi Vadra-i election nüboyim sentong ka nung jembidang tangokba noksa nung angur.

India-i Cuba nem teyari oset ton 20 agütsü

New Delhi, November 08 (Agencies): Tawa Hurricane Melissa agi Cuba linük kanga mejungi kongshiba sülen iba linük tanaben yangershiba mapang nung India-i Cuba nem teyari oset balala touzük seret 20,000 agütsüogo.

"Alima ya kibong ka dang, tangatetba nung India-i Cuba nung aliba nüburtem den tejashi lemsateper aser teyari agütsür," ta Havana nung aliba Indian Embassy-i metetdaksü.

India nungi yokba teyari osettemji Brihostibar aonung Cuba tonga bener otsüogo.

Teyari osettem rongnung medical trauma unit, mozü, generators, süki, yipten sü, hygiene kits aser solar milen densema oset aika densema lir.

Mongolbarnüa India-i Jamaica aser Cuba naprongla nem Humanitarian Assistance and Disaster Relief (HADR) oset ton metsütsü (20) agüja liasü.

External Affairs Minister (EAM) S. Jaishankar-i X

ajanga, "Hurricane Melissa lendong atalokba sülen Jamaica aser Cuba naprongla dangi HADR teyari oset ton metsütsü yokogo. Indian Air Force tayimtsü ka nung Arogya Maitri BHISHM Cube, chiyungtsü, mozü, medical osettem, power generators, süki aser hygiene kits densema oset aika bener New Delhi nungi apusoa ogo," ta metetdakja liasü.

India dang pelaba lemsatepa Cuba Foreign Minister Bruno Eduardo Rodríguez Parrilla-i social media ajanga, "East Cuba nung Hurricane Melissa lendong agi kongshiba nüburtem atema teyari oset balala yokba atema onoki India dang pelar. India sorkari temeim mapa inyakba atema nü dang pelar, EAM S. Jaishankar," ta metetdaksü.

October 29 nü Hurricane Melissa yipru tesashi ajanga Cuba kongshi, ta Miami nung aliba US National Hurricane Center (NHC)-i metetdakja liasü.



TIR YIMYIM YIMOBILEM (EDITRIAL)

DIMAPUR SUNDAY, NOVEMBER (YIMPOKSÜI) 09, 2025

Tepela abensaba anogo

Yisu Khrista aser pa sülen anidakertem teimbaka Yihuda nungertem liasü, anungji parnoki Yihuda nunger Laishiba nungi jembia liasü. AD 30 shi nung Yisu Khrista sür shia arur külen nungi Pa taküm otsü aser Pai jembibatem tebang ajanga dang jembia arua liasü. AD 65 shi nungiang item tebang agi jembiba otsütemji bendena zülutsü tenzük, aser ibaji Tasen Lai nung shilem tuluba ka koba dang 'Osang tajung Kaketterm' ta ajar iba ya lir. Saka Tasen Lai nung tejentiba zülubatem rongnung Pauli Khristan loktitem dangi züluba shititem ya liasü. Anungji item rongnung tejentibaji I Tesalonika ya AD 50 shi nung zülü ta laishirtemi putetter. Ano Tasen Lai kaketterm rongnung karbo AD mezüng noklangzüng tatemlen aser tanabuba noklangzüng tetenzüklen mapang nunga züluba lir. Tasen Lai kaketterm ya Grik oshi koba Rom yimli nung tongtibang oshi liasü, iba nungji zülü. Shiti aser kaketterm züluba mapang nungji, itemji kija arogo mesüra arogotem aser nisungtem asoshi balala dang amshia liasü. Küm noklang asem tashi, (AD 100-400) laishirtem aser arogo tebutem rongnung koba kaketterm aser shititemsa Tejen Lai kaketterm ama temeshi ta züngshia agizüktsü, iba indangji ashishitepa liasü. AD 367 küm Alexandria nung Bishop Athanasius-i kaketterm aser shiti 27 shimteta, itemji arogo aser kija taküm asoshi temeshi aser tashi akaba kaketterm ta züngshitsüla ta zülü. Itemji, iba mapang nung arogotem nung kanga sapua amshia aliba kaketterm 27 shimteta züluba liasü. Item kaketterm dangi tanü asenoki 'Tasen Lai' ta ajar. 'Tasen Lai' ya laishiba nung tanabuba shititem lir. Yangi keta aliba kaketterm 27 nung ya Tejen Lai nung tenzükba Tsüngremer nüburtem otsü indang maneni shia angutsü. Asen oshi nung 'Tasen Lai' ta asüba ya English nung "Testament" koba Latin oshi nung 'tezüngzüktepba' ta asüba nungi meyipzük. Iba tezüngzüktepba tongtibangji Mosa ozüngtem nungji angutsü. Shirnoki ozüngtemi ashiba angar, parnokji Tsüngremer nüburtemji lir. Tasen Lai nung aliba kaketterm ya Yisu kangki nung metar küm noklang ka tsüngda nung züluba kaketterm lir. Osang tajung kaketterm pezü - Mathi, Mark, Luke aser Yohan kaketterm nung ya tesem balala tsütsü nungi Yisu taküm aser pa tesayuba indang tabensa shia lir. Tenyartem mapa nung mezüng arogotem nung Yisu nütsüngtemi Pa osang tajung sayutsüngiba indang shia lir aser yamaji sayutsüngir Paul shititem nung Khristan taküm rangben libalirutsü aser Yisu sülen tsüngchir süa anidaktsü indang tabensa tesayuba angutsü. Tasen Lai kaketterm tatembangba Jungkai Adok nungji Tsüngremer alima aser kotak tasen bener aruba nung Tsüngremer nüburtem tarutsü teimla terajem shia angutsü. Laishiba nung ya Tsüngremer tenangzükba aika angutsü. Ali meimchir shirnokisa Pai ashiba angaa, Pa ozüngtem benshir aser Pa tesayuba nung tsüngchir süa ochishia alir parnokjibo Pai arishi moatsütsü, anisüngzük agütsütsü, tepela aser tesünep agütsütsü, rem lanu manung mejangdaktsütsü aser timtem anogotem nung Paji teyarir ka asütsü ta nangzuka lir. Item ajak dakji alia ano, shirnokisa Pa dak ochishia amanger aser Pai mulungba ama jajar parnokjibo süaka teti taküm alitsü asoshi tekümtet agütsütsü Pai nangzuka lir. Yisui ashi, Tebu kidang nenok asoshi talidak renemtsütsü ni aor. Pai renemja akadak teti tepeladak pa chirtem anir oa tebu kidangji alitsü asoshi kenü Yisu alimai arutsü aser shiba teka nung arr mali parnokji pai anir aotsü. Temeshipurtem atema iba anogoji tepela abensaba anogo shitakbaji asütsü, yangji amangba pur ajak densemstü renema alitsüla.

OLEMSABANG

ABAM PRESIDENT KISÜNG MASÜ LOCAL AROGO GROUND LEVEL TASHINUNG MELENSHITSÜLA.

~ K. LIMA LONGKÜMER

(Yashi adok nungi...)

Tataloktsü mangdang ka jempia ata.

2023 küm tetenzüklen Mungdang aser Arogo nung tejen tenzükker ka denni yamai jempia liasü. Oku ABAM President yabo Laymen nisung kati tenzüktsüla ta jempia liasü. Metsütse-i 2024 küm ABAM Mungdang akitsü anasa odila Nüklu Longkümer-i kasa tangatetba nung Tir Yimyim nung zülüla asenok nem züngdaktsüogo aji saka tenarong-a marepzü yakümsa ABAM President Pastor kati inyakka lia ano theology azünger katisa melen, taküm-a odilaisa October 15th 2025 nung züngdaktsüogo ano pa den odila Limawati Longchar aser L.kika pongenertemia pusemma zülügo. Takümbo iba onükji Mungdang nung jempitsü asü mijempitsü???

Parnoki tashe amshitsüsa ABAM Arla No kwi nung lir?

Toklang tenzükkeri jempiba aser inyakba kuli kar:

Küm semmer jakdang aser tawa tanü ni ajuruba aser angashia aruba kuli kar.

1. ABAM küm tatem mungdang nung Rev. Pastor Kati Khün o kar jempidang mungdangi arur kar dak sepete pitejang ta satoksatokka shitetba.
2. Associate Pastor Kati Arogo mungdang nung onok degree peria kar shia metetter, onok kechi agi madoksa alia ajemma mit adok.
3. 1993 ABAM Central Council nung ACYE balaka business hour mapang Arogotem nungi Youth Director temi Local Arogo nung CYE President post-ji parnok Youth Director-temi reppa inyaksü ta agenda aben aser ibaji akizükka ayu, iba mapangjisa parnok AK kolakji parnok tatah ta jempi, iba onük nungji Mungdang Officers, Youth Secretary, Associate Youth Secretaries aser Central Executive membertaini ola katah madok. Onük tembanga akizükker külen ni President dang mapang meshi aser pai mela. Ni ashibaji Youth Director aser CYE President power function palala indang rasaa ashi aser ano ni ashe ozü local Arogo nungbo nenok Youth Directortemi lemtetba makizüker aser nenok Y/D she kolak matah ta shir amen, iba sülen Town Arogo nungi CYE President kati kü ou pusem. Local Arogo nung itasen akia inyakker Y/D agenda abenba akokba jagi yimti tulu nungi aser Town CYE nungi budget saru magütsüra ACYE atema takoksa tulu asütsü. Iba anügoji onoki ola madok acübo ibajagi küm kwika otetlah? 1993 ACYE mungdang resolution kecha melemtet dazüngla nung senshi.
4. Youth Leader ka satitsü Engagement Bodbar aonung Pastor / Arogo Deacon board-i aki, paonungjisa Satitsü anügo shimmer sarasademmar senshi. Youth Leader-i shima akaba anügoji Women Leader satitsü anügoishika sülenshimmer Arogo Pastor ajanga Arogo writing pad nung nai shimma aliba anügoji Women Leader nem azüngtetjang ta shidiaru Youth leader jagi yamai langzü, ni Arogo tenzükker den külemi shimba anügoji laia akinüra laa kasa anügoji külemmi satidi ta Arogo W/Pad nungjisa zülur yok, tanaben-a ano Pastor ajangasa mepishia shidi züluba aru, anungji Pastor-i ashiba angaa anügo shimma akabaji Women Leader nem azüngtettsü.
5. Arogo ka nung Women Department nung Women Workers ana kiyong ka nungi sodi aki, tena melen tenadi nübu ka shimmer agütsü, aji women leader-i makizük, nübu shimma agütsüba jibo Arogo nung telitak nübu saka labo Town ka nungi Women Leader inyaksü anir aruba nübu liasü. Larnoki church member aser Associate Member tetezüa memetet.
6. Arogo nung member tajung sorkar mapa nungi Secretary Retired kati Laishiba kanga nendakka azünger kati laishiba nung aibelenba aika potet aser ibaji Tir Yimyim nung aser ABAM Literature Secretary nemma copy agütsü. Künü Retired Officer-bar Arogotsür sentep mapang Retired-ba kinungtsü dang laishir tetsür kati nububa nunger Theology mazünger Laishiba nung correction tagütsü ta shiang ta shiokba angashe. Aor Laishir toklang tenzükkerteri Ao oushi memetetbayong English nungi aibelenna meyipzükba aeka lir, ibayongji tang Temeshi Lai teyanglushidak lir. Yamala mesükba karibosa ajurushia alitsü.

Akedang nungi lemtetta akaba sentep anügo shibangba.

1. Ao Arogotem nung Pastor aser Board of Deacon-I Sunday school sentep shibangngugo.
2. Arogo kar nung Bodbar sentep shibang aser Arogo kübok Department ka nem Bodbar aonung sentep jurila akitsü lezmüktsü.
3. ABAM aser NBCC kübok Arogo karibo 25 December aonung aser New Year aonung Bodbar aser Honibar tenjiyonga sentep maker. Shir Arogo nung aji atalokka ali Pastor ita ka atema suspend sütsütsüla aser Arogojia Hapta ka shebangtsüla. Nenoki tenla kidang jempidang tanü alima Technology nung kanga karaa ainna tabo jempir, ajisaka Aor Arogobo teraksaba Technology nung asonga lir.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Pastor Koh samaba ken o nung sorkar dang temenok agüjang ta tuyu



Pastor Raymond Koh'er kibong noksa nung angur.

November 08, 2025: 2017 küm Malaysia nung pastor Raymond Koh puer aoba nung sorkari-a shilem agia lir, ta aija tan hopta Malaysian High Court-i sorkar aser police dang Raymond Koh kinüngtsü nem temenok, Malaysia nunger Ringgits sen million 37 (Pound sen million 6.8) agüjang, ta tetuyuba agütsüogo.

November 05, 2025 nü Justice, Su Tiang Joo-i sorkar dang, pastor anema aibelenba atema pa kinüngtsü, Susanna Liew nem temenok agüjang, ta obendang agütsü.

Ajisüaka court-i sen ajakji trust nung yua atatsüla; Pastor Koh kong aliar mejangja tashi senji pa kinüngtsü Liew mesüra lar chirnur asem nem magütsütsüla, ta tuyu.

2017 küm February 13 nü anüngdang Petaling Jaya nung SUV gari asem aser tanga gari pezü nung tebur 15 shi aruba sülen Pastor Koh puer oa liasü.

CCTV noksa aser tenük kuli alirtemi ashiba apibo pastor puer aoertemji training junga agiba nisungtem liasü. Iba mapang nungjagi tenzüka tanü tashi pastor Koh kong aliar mejangjar.

Court-i obendang agütsüba sülen Liew-i, "Kü

melung anisüngzüker, kechiyong ni ochi obendang nguogo. Küm 9 jungnüa kinüngbu ka aser tebu ka samaba mapang tejashi aser terata agi sünga liasü, aser tang obendang agütsüba ya mapang talangka nungi yongyaa ataba liasü. Iba ya ajanga Koh tanaben anir marutettsü, saka ozü kibong atema iba ya ochi obendang anguba amai lir. Onoki iba atema ya mapang talangka raraa aruogo. Koh ya tamangtir ka, temeim aketba aser tasütait nisung ka," ta metetdaksü.

Iba obendang pelaa agizüka Christian Solidarity Worldwide tentetsang, Mervyn Thomas-i, "Susanna-i ashiba ama iba obendang ajanga pa tanaben anir marutettsü, anungji onoki maneni Malaysia nung ketdangsertem dang Koh dak kechi atalokar tejangja metettsü atema bushisüngdangtsü akhanger. Iba ya tongtibang obendang ka lir, kechiyong iba ya ajanga Judiciary-i nija tashi sorkar madak amshiba temaitsü sayur," ta metetdaksü.

Raymond Koh ya Malaysia nunger Khristan pastor ka lir. Malaysia nung HIV/AIDs agi shirangertem, temesepba mozü achirtem, amitsürtem aser tanurtem yaritsü atema pai melungtet telok ka tenteta liasü. Pai tentetba organization jagi Muslim nungertem Khristan yimsü dangi meyipdaksür ta olulu prokba sülen mapang ka nungbo Islamic lenirtemi pa indang organization anema bushisüngdanga liasü. Yaküm August ita nung Malaysia nung High Court-i sorkar ketdangsertem dang Pastor Koh kinüngtsü, Susanna Liew-i meshiba ama report agüjang aser pastor samaba osang tejangja agüjang ta tuyua liasü. 2017 küm February 13 nü pa kinüngbu Pastor Koh samaba anema lai benokba ken o dak sendakba nung lai iba temepishiba agütsübaji tim dang, ta court-i metetdakja liasü. Küm pongu tejaklen Liew-i police, inspector-general of the police (IGP) aser taoba mapang police officers aika anema ken o benoka liasü. Liew-i benokba ken o nungji taoba mapang IGP ana- Khalid Abu Bakar aser Fuzi Harun na den taoba mapang principal assistant director of Special Branch's social extremism division, Awaludin Jadid nunger tenüng densema liasü.

Dibrugarh nung Khristantemi asürtem bilemteta sarasadem

Dibrugarh, November 08 (Agencies): Taoba Amongnü Dibrugarh nung aliba Arogo balala nungi Khristantem aika Khristan leper tejenba nung adenshia All Souls' Day among.

Dibrugarh Inter Church Forum-i ayongzükbaba sentong nungji sarasadem sentong agi aser asürtem nem akhüm agüja leper nung candle tsükloka yutsü.

Dibrugarh Inter Church Forum (DICF)-i ayongzükbaba sentong nungji jila nung aliba Catholic aser Baptist Arogotem,

Church of North India (CNI), Church of Jesus Christ aser Kuki Fellowship densema Arogo aika nungi züngsemtem aden.

Alima tesem balala nung küm shia Khristantemi All Souls' Day anogomong monga asürtem atema sarasademtsür.

Amongnü iba sentong ya DICF Tir, Denis Bird leniba nung agi aser sentong tenzüka Sacred Heart Cathedral nung putir, Gabriel Kujur-i sarasadema liasü.

Catholic Diocese of

Dibrugarh nung putir, Joy Pallikunel-i, "Asenok toktsür pilaba adianutem tanü asenoki bilemteter aser tanela nung tesendaktep aliba bilemteta parnok tanela asoshi sarasademtsür," ta metetdaksü.

Sarasadem sentong tembangba sülen Khristantemi pei kinünger asürtem leper nung candle tsükloka yutsü. Iba dak alia nikongdang Paltan Bazar nung aliba Khristantem leper nunga sarasadem sentong ka agia liasü.

ANOGO ABEN TSÜNGREM DEN
NE ETEYARI TEKA SALATSÜ
NUNGNANGA TELI

"Shibai sensaker dang aria bilemer, pai Kibuba nem aputsür, aser pa mapa tajung asoshi pa nem pai shia agütsütsü."
Apijemtsü 19:17

Lai O ajanga Tsüngremi sensaker asoshi bilemetsüba iba shia agütsütsü ta asüba tangatetba ya Kibubai sen aser ali lai tekong nungi angateter. Kibuba nem aputsür nem pai rongsen kechisarena asenok nungi meyipa angutsü nungdakbapur yarirtem Tsüngremi kodanga imlaba indang masü saka timtemer sensaker mamadoktsü, par mapa tajung yari meyipa moatsütsü indang ashir ta angateter.

Tha lima nung rongsen tulu hon tariba senti osettem entisa jenti lir. Saka item ajak yogi taküm nung tepela, jesünep arishi talang kodanga malizüktettsü. [süngremer temoatsütem ali jenjang tulu, taka tait Lechia agi malizüktettsü. Item temoatsü yabo Tsüngrem mungi dang angutsü; aser aji Pa den yimjung nung Pai uginüba ama inyaka alir asoshi dang lir.

Tsüngrem den yimjung nung lia sensaker aser timtemer soshi teyari teka menungnangi salar ka ka kuma alitsü nerangdi.

Global Day of Youth Evangelism
anogomong nung lanur aikati shilem agi

November 08, 2025: Lanur organization 'Dare to Share' teloki ayongzükbaba ama November 8, 2025 nü Global Day of Youth Evangelism anogomong nung alima tesem balala nung lanur million aikati Khrista osangtajung lemsatepba nung shilem agiogo.

Greg Stier-i tentetba Dare to Share leniba nung English aser Spanish oshitem nung video aika saya aser online ajanga sentong balala agiba den külemi pei tamangba yimsü tangartem den lemsateptsü atema practical training agütsü.

Philippines nunger Pastor Erick Totañes-i, iba anogomong ya lanur tamangertem külem nükjidong ka yur longjemba anogo lir, ta ashi.

Paisa, "Küm ka nung Global Day of Youth Evangelism ya anogo ka dang amonger, aser iba anogomong nung onoki alima tesem balala nung lanurtem dang peipei Arogo Tenla kidang mesüra kidang adenshia lanur lenirtem leniba nung sentong nung shilem agitsü ajungshir," ta metetdaksü.

"Khrista osangtajung lemsateptsü atema onoki parnok nem tesayuba agütsür aser ajungshir. Dare to Share-i tainlonglongpurtem aser lanurtem dang pei medemertem den Khrista osang lemsateptsü ajungshir," ta pai metetdaksü.

Pastor Erick-i, "Tanü lanurtemi taküm nung nükjidong aser tetezü bushir, aser yamaji Arogoi lanurtem tzürabaji süngzükbaba ochi aser temeim

lemsateptsüla," ta ashi. Dare to Share-i training agirtem nem "Life in 6 Words" tesayuba agütsür, aser ojang trokji GOSPEL lir.

G - God created us to be with Him (Tsüngremi asenok Pa den alitsü atema asenok yanglu).

O - Our sins separate us from God (Asen menen ajanga asenok Tsüngrem nungi pilar).

S - Sins cannot be removed by good deeds (Mapa tajung inyakba ajanga temenen magientettsü).

P - Paying the price for sin, Jesus died and rose again (Asen menen alangzüksü atema Yisu asü aser tanaben shia aru).

E - Everyone who trusts in Him has eternal life (Pa dak amanger ajak tatem makai taküm alitsü).

L - Life with Jesus starts now and lasts forever (Yisu den taküm tang tenzüker aser teti atema asütsü).

Pastor Erick-i, iba ama tongmelang tesayuba ajanga lanurtemi Khrista osangtajung melamela angateter, ta metetdaksü.

"Mapang ka nung kü dak Khrista maliasü. Ajisüaka tangbo ni tatem maka taküm nguogo. Yamaji alima nung lanur ajak nem ibaji kadaktsüner," ta paisa metetdaksü.

Global Day of Youth Evangelism nung shilem agitsü atema lanurtem, telok balala aser Arogotemi DGYE.org nung jelia tenüng agütsü aser Honibarnü iba anogomong sentong nung shilem agiogo.

AO OSHI ANGAZÜKDAK:**TANÜ ANGAZÜKTSÜBA OJANG****Tongshi**

(v) tokolak agi kongshi (touch by head)

* Ball raktepdang kü kolak agidang ball tongshi.

Tongta

(n)O agi osang metetdakja ao (passing verbal information to every individual)

* Yim nüboyoki aotsü atema lanurtemi tongta.



Tir Yimyim

OLONG PAITEP # 7324

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPIEN

2. Teburtemi tejak nung awaba
6. T _ _ _ em
8. Tzüik ayudak
9. Nüngdakba dang timba
11. Züina ao
12. Yangi tzü angur
14. Tangar dang nungi tali
16. Senyong masü
17. Oadokdi
18. Tzü tarok
19. Yimtaklir aikati iba ya ki den
külemi yanglusemer

LANGTSÜNGLEN

1. Temejangdak
3. Nisung ka mapa inyaksü nübo
4. Azüntsü asoshi mejemba
5. Tesangwa agütsüba
7. Tila masü
10. Tebenjem tetsür chanu
11. Tekolak nung inok
12. Tetsüngda
13. Tangar inyakba ka inyak
14. Tim masü ta ashi
15. Asalendong
16. Tanüdagtsü

OLONG PAITEP # 7323 TELANGZÜBA**TIPIEN :**

1. Amet, 3. Kensü, 6. Tetemjen,
8. Asük, 10. Tenütsü, 11. Asep,
14. Tamanger, 15. Atema, 16. Inti.

LANGTSÜNGLEN :

2. Metet, 3. Kima, 4. Sentsü,
5. Semki, 7. Tesep, 8. Asüng,
9. Tanga, 10. Tentet, 12. Teret,
13. Sasa.

NAI-A YA METETTER

Sintex, India küm 50 ajungba benjung nung Guinness World Record ka yanglutetogo. Sintex, India ya water management solutions nung nübortemi temulung lemtetba company ka lir aser parnoki ghonda 24 tsüngda nisung 31,000 nem "responsible water usage" atema tezüngzüktep agidaktsüba ajanga alima otsü tasen ka yanglu.

Sintex products ajak ya 100% food-grade virgin plastic ajanga yanglur aser iba ajanga BPA, phthalates, o formaldehyde amala recycled plastics nung aliba toxins nungi nisungtem kümzüker.

Meghalaya CM-i World War I memorial atema lung azüngtsü

Shillong, November 8, 2025

(Agencies):

Meghalaya Chief Minister Conrad K Sangma-i November 7, 2025 nü Tura nung Cenotaph yanglushiba maparen tenzüksüogo.

Iba Cenotaph ya First World War nung Garo Labour Corps-i tenzüksüba atema tetushi agüja yanglur.

Iba tesem wazüka ayutsü aser renlokdahtsütsü atema aser parnoki Garo Hills nung civil society aser tongtipang nisungtem den asüngdangtepa final plan agizükogo.

"Garo Labour Corps nungi kinungertem aruba aser yariba atema pelar" ta CM

Conrad-i metetdaksü.

State sorkari Garo Labour Corps ajanga shilem agiba putiotsütem bendenba nung teyari agütsütsü.

Iba memorial site ya Garo Labour Corps ajanga wartime service atema tetushi agüja yanglu. Tang iba ya tarutsü pututem asoshi tajungba küma yanglushitsü.

World Cup winner Uma Chetry nem tetushi agütsü

Guwahati, November 8, 2025

(Agencies):

World Cup angur Indian women's cricket team nungi Assam nungia asayar Uma Chetry densema lir aser iba asoshi la nem tenüngsang agütsüogo.

La ya Golaghat district kübok Bokakhat nung alir aser Golaghat District Commissioner o Superintendent of Police nati lar ki tonga oa tenüngsang agütsü.

"Assam nungi Olympic medalist ka aliba dak alia World Cup winner Uma Chetry lir. Bokakhat nungi lai international

sabang atongba ya odangbo masü. Uma nem temoatsü agütsür" ta Assam Chief Minister Himanta Biswa Sarma-ia metetdaksü.

Bokakhat nung Uma Chetry den ajurutepdang Sub-Divisional Officer (Civil) Bokakhat, Sub-Divisional Police Officer, Bokakhat Revenue Circle nung Circle Officer aser Sports Department nungi ketdangsürtem aden.

"Uma dak alizüng tulu lir ta onoki meteta dang liasü. Lai India atema iba takok tulu anguba asoshi ozü kibong kanga

pelar" at Uma tebu Lok Bahadur Chetry-i ashi.

"Uma-i takok anguba ya ozü yimertem aser Assam nungeri yariba ajanga lir. Onoki nenok ajak dang kanga pelar" ta tetsü Deepa Chetry-ia ashi.

Ketdangsürtemi Uma'er tsüraburtem dang la nungita yariba atema pelaba metetdaksü.

Uma Chetry ya Bokakhat Revenue Circle kübok Kandulimari village nungi lir. Lai local cricket nungi international level tashi atongba ajanga lai bendanga agütsüba aser tashi angaba sayur.

CM Pema Khandu anentsü takhangba agüja lungkak ait

Guwahati, November 8, 2025

(Agencies):

Arunachal Pradesh nung Jan Andolan Anti-Corruption Movement-i India Against Corruption Arunachal unit aser tanga teloktem den yaritepa Chief Minister Pema Khandu mapa nungi anenang ta takhangba agüja lungkak aitogo.

"Chief minister Pema aser par kinungertem anema

ochimashiba ken o tem benoka lir saka item ya mapang shitak nung angadanga maoer" ta Jan Andolan Anti-Corruption Movement chairman Nabam Tagam-i ashi.

"Onok nem temeten agütsütsü menuba atema jashir. Onok asoshi tanga lenmang kecha mali aser iba jagi yimjak nung benoktsüsa akümer. Arunachal nung

alirtemi sorkar tia lemtetsü" ta Tagam-i ashi.

Sorkari ochimashi ken o tem atema CBI nem bushisüngdang südaktsütsüla aser chief minister menden nungi anentsüla ta paisa ashi.

Tarutsü nung onoki iba ken o atema Prime Minister's Office dangi memorandum ka yoktsü sentong lir ta Tagam-isa metetdaksü.

Afghanistan aser Pakistan na yimjung atem sensaksem chirepogo



Kabul, Yimpoksüi/November 8 (Agencies): Afghanistan aser Pakistan na tsüngda yimjung atema sensaksem chirepogo, saka kidanger linük ana tsüngda ceasefire bo maneni benoka atatsü, ta Taliban otongdar kati Honibarnü ashi.

Zabihullah Mujahid-i ashiba agi, Islamaba-i Pakistan telung nung security atema Afghanistan-i khuret abentsü nenshiba ajanga iba sensaksem chirep, kechiyong iba takhangba ya Afghanistan tazüokba kübok mali.

Ajisüaka pai ashiba agi, "ceasefire koba benoka ali iba

yabo onoki tang tashi nungbo meraksai lir aser maneni benoka inyaksangshitsü," ta ashi.

Hokolbarnü Pakistan Minister of Defence Khawaja Muhammad Asif-i, arrtsü nung asendenshir rara adoktsü aliba nokdangtsü nükjidong nung Istanbul nung Afghanistan den yimjung atema sensak asem saka chirepogo, ta ashiba den Afghanistan litsü nungi Pakistan mamak tashibo ceasefire benoka atatsü ta metetdaktsü.

Afghan aser Pakistan nunger sepaitem Brehostibarnü arrtsü nung mapang tatsüka

atema khatepa liasü. Iba anogo Istanbul nung yimjung atema sensaksem tenzüka liasü.

Linük ana nungi sepaitem taoba ita raratep aser iba mapang nisung aika khaseta liasü, koba 2021 küm Taliban-i sorkar atsüngba sülen rara tesashitiba liasü.

Linük anapronglai October ita Doha nung ceasefire ka nung sign asü, saka taoba hopta Istanbul nung sensaksem tanabuba shilembo tenangzüktepba ka meyangluteti tembangogo, kechiyong Afghanistan litsü nung amendaker Pakistan amakba telungpur dak sendakba nung linük ana tsüngda tangatettep ka dangi maruteti liasü.

Küm aika Pakistan aser Taliban na tesendaktep kanga junga aruogo, saka kümtem tsüngda tesendaktep raksaogo.

Pakistan-i anüng ajanga Pakistani Taliban dak rangloker Kabul dena tesem balala amakba sülen October ita linük ana tsüngda raratepa liasü.

Russia atema raratsü asoshi Africa nunger 1,400 anisemogo: Ukraine

Kyiv, Yimpoksüi/November 8 (Agencies): Ukraine Foreign Minister Andrii Sybiha-i, Africa linük 36 nungi nisung 1,400 dak tema Ukraine den rara nung Russia atema raradar, ta shia srokar balala dang lisopurtem iba rara nung shilem magitsü atema tekümdangtsü metetdaktsütsü mepshia metetdaktsüogo, kechiyong raraba tesem nung parnok kanga kara tepsetatoker, ta ashi.

Rara nung shilem agitsü atema Africa nunger anisemba aser parnok den tasütsü atema nangzüktepba den saku military contract tem nung sign sütepba atema Hokolbarnü Sybiha-i Moscow aitsüogo.

"Russia indang army nung bendangertem tia kanga majung. Parnok ya timba raraba tesemi yoker aser kanga kara tepsetatoker," ta Sybiha-i X nung zülutsü.

"Mercenaries tem timba ita ka dak tali meliteter," ta pai ashi.

"Russia-i tasa balala amshia Africa linüktem nungi nüburtem

anisemer. Kar nem sen agütsür aser karbo kechi atema tenangzüktepba yanglurar mejangjai anir arur, mesüra karbo amokmerena dendaktsür. Contract nung sign asüba ya tasütsü atema sign asüba den kasa lir," ta pai shisem.

Africa nung sorkar aikati lisopurtem Ukraine den raratsü atema Russia den adenba indang nangzüker aliba mapang minister-i iba tekümdangtsü metetdaktsüogo.

South Africa-i Brehostibarnü ashiba agi, mercenary telok den lisopur 17 kodaser aden aji jangjatsü atema bushisüngdang tenzükogo. Item nisungtem yagi kidangi meyipa aotsü atema teyari meshiba sülen iba ken o ya temai adoka liasü.

Tir Cyril Ramaphosa-i ashiba agi, arishi küm 20 nungi 39 tsüngda aliba South Africa nunger teburtem, employment contract tajung agütsütsü nangzüker mercenary teloktem nung adentsü atsür ao, aser parnok Ukraine kübok Donbas

tesem nung sabanger taolen makai akümba sülen teyari meshia call süogo.

Kasa mapang nung South Africa aser Africa kübok tanga linük nungi tetsürtem social media campaign balala ajanga parnok nem catering aser hospitality amala nung mapa agütsütsü nangzükba sülen Russia indang drone factory tem nung mapa inyakdaktsüba atema Russia aitsüogo.

Kenya-ia taoba ita, lisopur kar Russia indang military camp tem nung sota aliba indang metetdaktsüogo.

Hokolbarnü social media nung post ka ajanga Kenya Tir William Ruto-i ashiba agi, pai Ukraine Tir Volodymyr Zelenskyy den Kenya nunger lanurtem ozüing alema Ukrain den raratsü atema anisemba indang jembaliogo. Tenapronglai iba amala rara nung shilem agiba ajanga takoksa ajurutsü aliba indang tekümdangtsü metetdaktsütsü bangjemogo, ta paisa shisem.

N Korea-i jenjang tesashi agitsü amokmeren

Pyongyang, Yimpoksüi/November 8 (Agencies): North Korea indang defence minister, No Kwang Chol-i, United States indang aircraft carrier ka South Korea nung rongnendak ka tonga aruba aitsüogo, aser Pyongyang-i tsükchirtem anema jenjang tesashiba agitsü ta amokmerenogo.

North Korea-i linük anüdok tzükümlen short-range ballistic missile tem tendangba sülen anogo ka lir minister-i iba tekümdangtsü ya metetdakja liasü.

"Tsükchirtemi amokmerenba anema onoki jenjang tesashiba agitsü," ta defence minister-i ashiba North meyong Korean Central News Agency (KCNA)-i Honibarnü sangdong ka ajanga metetdaktsü.

"North indang security amokmereba tashitem ajak ya target akümtsü, aser item anema jenjang tapet agitsü, ta defence minister-i ashi.

North Korea nunger ti aser company ana nem tenokdangba agütsüba Washington-i sangdongba den US Defense Secretary Pete Hegseth-i South Korea semdangba sülen Hokolbarnü missile ya tendanga liasü. Item nisung aser company tem ya cybercrimes dak sendakba nung senotsü ochi meshi-i amshiba atema aitsüogo.

US aser South Korea defence tekolaktemi North aser South Korea na arrtsü semdangba aser iba sülen security dak sendakba nung Seoul nung sensak asemba indang jembiba mapang North Korean defence minister-i, linük ana yagi parnok indang nuclear aser conventional weapons force tem integrate asütsü tasa asaba atema aija liasü.

KCNA-i ashiba agi, South Korea-US Security Consultative Meeting (SCM) aser tawa the USS George Washington aircraft carrier aser Fifth Carrier Strike Group Busan rongnendak tonga aruba indang telangzüba agütsüba mapang defence Minister-i iba olen ya lemsatepa liasü.

US strike group South tonga aruba ya Freedom Flag ta nüngja agütsür US aser South Korea nunger sepaitem tsüngda military drill ayongzüka agiba den denchiteper.

SCM sensaksem atema South Korea semdangba mapang Hegseth-i, North aser South na tsüngda Demilitarized Zone (DMZ) nung tangokba noksa aika social media nung lemsatepa liasü.

Pyongyang-i ashiba agi, Hegseth aser South Korea nunger lenirtemi DMZ semdangba ajanga DPRK anema parnoki jenjang agiba sayur.

US sorkar ketdangsürtem G20 summit nung madentsü: Trump

Washington, Yimpoksüi/November 8 (Agencies): US Tir Donald Trump-i Hokolbarnü sangdong ka ajanga, iba ita tatemlen South Africa nung agitsü aliba Group of 20 summit nung US nunger ketdangsür kati danga shilem magitsü. Pai ashiba agi, South Africa nung meimchi temeden anema inyaksangshir.

South Africa indang foreign ministry-i, iba telemtetba agiba ya tesasatsüka ta ashiba den, Trump-i, tanak nisungtem timba aliba iba linük nung temesüng nisungtem reshikangshia amshir ta shia parnoki aitsüba magizüki liasü.

"South Africa nung G20 ayongzüka agiba ya taktsüka," ta Trump-i Truth Social nung ashi. "Afrikaners (Dutch, French aser German immigrants) nungertem tepseter aser parnok ali aser alutem ozüing alema rakzüker," ta pai ashi.

"Iba amala meimchir temeden anema inyakba ali tashi US nunger ketdangsürtem shinga madentsü. 2026 G20 senden Miami, Florida nung ayongzüka agitsü yongya atar," ta Trump-i ashi.

Kasa mapang nung Vice President JD Vance, shiba Nov 22-23 nü Johannesburg nung



US Tir Donald Trump

G20 lenirtem senden nung shilem agitsü imla liasü, pa-a maotsü, ta ken o jangja aliba source kati metetdaktsüogo.

Trump-i, South Africa indang domestic aser foreign policy tem ashishiogo, kong parnok ali policy nungi tenzüker Gaza rara nung Israel aitsüba densema lir.

South Africa indang foreign ministry-i, Trump-i Truth Social ajanga pa tebilemba lemsatepba ya tenok tenoka angaokogo ta ashiba den, Afrikaners tem reshikangshia amshir ta aitsüba ya khenyongi magizüker ta ashi.

"Iba lokti ya reshikangshia amshir ta ashiba ya nongittsü atema kuli mali," ta ministry-i ashi.



Ministry of Culture
Government of India

CENTRE FOR CULTURAL RESOURCES AND TRAINING
(Ministry of Culture, Government of India)
Plot No. 15 A, Sector – 7, Dwarka, New Delhi – 110075



SOBALIBA LUYIM BALALA NUNG LANUR ARTISTES TEM NEM SCHOLARSHIPS AGÜTSÜTSÜ

Sobaliba luyim balala nung lanur artistes tem nem Scholarships agütsütsü atema Indian Classical Music, Indian Classical Dance, Theatre, Mime, Visual art, Folk, Traditional & Indigenous Arts aser Light Classical Music luyim dak sendakba nung CCRT, Ministry of Culture, Govt. of India-i offline applications jaoker.

Application tem ya November 10 nungi tenzüka 2025-26 küm atema jaoker ta metetang. Taküm küm atema scholarships 400 lir. Scheme indang osang tejangja, applicant tem atema tetuyuba, eligibility conditions/criteria aser application form ya Ministry of Culture, Government of India aser CCRT indang website tem nung angutsü.

www.indiaculture.gov.inwww.ccrthindia.gov.in

15th December, 2025 is the last date for submission of applications.
ONLY OFFLINE APPLICATIONS WILL BE ACCEPTED

cbc 09127/12/0007/2526

ISL tender tejangrar mali; AIFF tebilemstsü akar

Delhi, Yimpoksüi/November 8 (Agencies): India nunger football asayartem tekolak menüa aliba nung ano tsükshir ama, Indian Super League tender process mapang atsülanga yimjak nung prokshiaka AIFF-i bids atsür marutet, aser November 7, 2025 anogo züngzüksüba nung bids kata mali tembanger.

"Indian Super League (ISL) atema Commercial Rights monetize asütsü temeden agütsütsü asoshi Request for Proposal (RFP) nung telangzüba bids mapang anogo latettsüba tanü süyir," ta AIFF ajanga social media nung metetdaksü.

"Mapang latetja aliba nung bids kata maru. Tensa asadanga tarutsü nung mera agitsü indang jembishinütsü asoshi hopta tatemlen AIFF Bid Evaluation Committee senden ka ayongzüksü," ta India nung football ketdangsüba tentet

ajanga ashi.

ISL indang broadcasting, sponsorship, digital aser merchandising rights ketdangsütsü asoshi commercial partners tasen ngutettsü nükjidong nung tender ya October 16, 2025 nü tenzüka liasü.

October 25 nü pre-bid conference agiba mapang Football Sports Development Limited (FSDL), FanCode (owned by Dream Sports), Conscient Heritage Group, aser bendanger telok kati tejangraba aliba sayuogo.

Ajisüaka, item teloktem ya kati danga formal bid mebenok. Bidder tem rongnung kabo tejangraba balala asüba agi magizük aser tangartemi tender indang financial structure aser league inyaksangshi mejangjaba atema tebilemstsü akaba lemsatepogo.

FSDL, shirnoki taoba

mapang Master Rights Agreement (MRA) kübok ISL indang commercial rights achaayanga liasü, parnoki osang tejangja meshiogo aser tasüngdangba 100 dak tema benokogo. AIFF-i tasüngdangba 230 dak tema telangzüba agütsüogo aser mapanglem aser bid criteria yanglushitsü atema inyakyim metongshiba aika sangdongogo, ajisüaka bid asür mali, ta source-i metetdaksü.

Tang inyakyim tasen benokba kübok annual guarantee sen crore 37.5 mesüra gross revenue shilem 5 meshir, koba league jenjang asadanga khenyongi meputep.

AIFF tang rongsenketzüng nung inyakyim asadangshitsüsa kümogo aser rongsenketzüng nung tetsükdaksü adokba ajanga grassroots development, national team nem senotsü teyari agütsüba, aser league inyakyim ajak nung kongshir.

Tai Tzu Ying badminton asaya nungi anisüngzüker

Yimpoksüi/November 8, 2025 (Agencies): Taiwan tsürtem rongnungi nüngtugu badminton asayar Tai Tzu Ying-i la asaya nungi anisüngzüksü atema telemtetba agiba Hokolbarnü sangdongogo. Yiruba ajanga arishi küm 31 tain asayar ya junga masayateti aruba sülen tang asaya nungi anisüngzüker.

"Taküm nung tapak tebor tajung ka tatembang ka dangi aruogo. Badminton asaya dang kanga pelar. Kü indang career nung taoba küm tasaktiba liasü," ta lai Instagram ajanga metetdaksü.

"Olympic masaya tsüngda ni tetsü yirur aliba ajanga tanaben tokteptettsü metokteptettsü mejangjai liasü, saka ni takokba tashi inyakogo. Tangaria ni metoktsü anungji nia metoktsü merangogo.

"Iba sülen yiruba ajanga ni court toktsür aotsüsa aküm. Ni imlaba ama kü career metembangtet aser iba ya angatettsü mapang tatsükabo agiogo. Tetsüng anaprongla

surgery agiba den rehabilitation mapang talangka agiba sülen ni taneptsü bushiba mapang ni nongita yarir ajak dang kanga pelar," ta lai shisem.

"Asaya nungi anenba sülen kechi inyaksü tang tashi telemtetba agia mali, saka tangbo ni alarm clock medeni taküm jangradema alitsü. Nenok ajak dang maneni kanga pelar. TTY putu tatembang ka dangi aruogo, saka TTY tanüla nenok ajak den alitsü imlar," ta laisa shisem.

2020 Tokyo Olympics tetsür kija asaya silver medallist la yagi 2018 küm Jakarta nung Asian Games asayaba mapang gold medal ngua liasü. Asian Championships nung lai 2017 aser 2018 küm Wuhan aser 2023 Dubai nung temaba jenjang tonga asaya liasü.

BWF Tour nung lai asayamung 17 kokogo aser tanga asayamungtem aika nung final tonga asayaogo. Taiwan tsürta yagi BWF Super series nungi title 12 aser BWF Grand Prix nung title asem bena lir.

P. Shilu Ao nüngtem nung lipuyimpur... (TAPAK 1 NUNGI...)



Paisa saisabong tsütsü olen kar ashidang, tawa-tanü saisabong aika adokyonga otar, saka lanurtemi asen tetsü teboui asaya-a aruba saisabongtemji metsünga reta wazüka ayutsübaji kanga tongtibang lir, ta metetdaksü.

Aor dang masü Naga nunger indigenous asaya aika lir, alima ajunga nung reprangdangra tensa den apet saisabong balala yangerteta aruba otsütem lir. Item ajakji nükjidong balala lir, asaya karbo telungjem aser teputep adokdaksüba-a lir, asenoka anogo ana tashi koba otsüla oboula nungeri tenzüka yutsüba saisabong asaya-a arur, item ajakji nükjidong tajung nung tentet, item nükjidong atalokdakja asayatsü tim. Iba ya ajanga asen yimti nung kin o kin, mepu tsüngta, yimer rongnung telungjem adoktsü, aji sür temeket yimtsüng 10 den aser Aor ajak lungjema amungtsü nükjidong asütsü paisa ayongzük.

Sentong shibangtsür MLA & Advisor, Law & Justice and Land Revenue, T.N Manen IAS (Rtd)-i jembidang, ar atsütepba ya Olympic nungbo asaya ka ama züngoka masayar, saka ibai

alima ajunga nung nüngtugu süa asayaba saisabong ka lir. Iba asaya nung Thailand nunger tetsür aser tebur na pronglai kanga tajung. Iba asaya nung tanü alima nung parnok tematiba jenjang nung lir. Iba benjong aser ar atsütepba tetoktepba ya tarutsü nung tajungba aser tuluba ayongtsü merangtsü, anungji, ajaki amaliteptsü ajungshir, ta metetdaksü.

"Tanü asen lima telungjem agi anünga lir, anungji, iba ama saisabong ka ajanga telungjem tenzüksü imlar. Tanü koba meimtepa asenoki iba benjong aser tetoktepba akar, ibaji meraksai asenok telungjemba aotsü merangtsüla", ta paisa ayongzük.

MLA & DPDB chairman, Nuklutoshi-i mapang tatsüka agidang, kishikina yim jaoka iba ama telungjem sentong tajung ayongba asoshi pelaba ashi. Tanü Aor political lenir aser Arogo lenirtemi anogoshi sabang balala nung Aor lungjemtsü atema jembir, saka asen Aorsa melungjemba, tanü asenok iba tia nung lir, ta metetdaksü. Tanü koba mapa tajung tenzüker aser samanir P. Shilu Ao tenüng nung asenok

ajuruteper, asenok lungjemba ajanga asen Aor ajak lungjemdaksütsü asoshi mapalem kar inyaksü nükjidong südi, ta paisa ayongzük.

Tanü alima nung saisabong tapu aika asayar, saka asen nüburtemi indigenous games kangabo sapua masayaba mapang ka, tanü iba sentong ayongertemi akhi asen tsüraburtemi asaya-a aruba saisabongtem asendenshitsü merangba asoshi pelar, ta MLA & Advisor, Fisheries & Aquatic Resources, A Pangjung Jamiri metetdaksü. Ashiko, tsüraburtemi asaya aruba saisabong karbo international level nunga züngoka saitsü mapangi bener arutsüa akok, ta paisa shisem.

Sentong nung Ao Senden Tir, Marsanen Imsong, Longjang Village Council Chairman, Ningshi Aier, Longjang Riongjanger Cultural Society Tir, Imnatemsu Aier aser ano tangar karia shilem agia liasü. Iba sentong nung telok balalai sobaliba yimya nung kentenmenü, yartsüngsang, sobaliba saya balala ia sayuba ajanga benjongmungertem kanga longsodaktsü.

ISSF World Championships: Ravinder Singh-i gold angu



Ravinder Singh

Yimpoksüi/November 8, 2025 (Agencies): ISSF World Championships (Pistol/Rifle) nung Honibarnü army marksman tejen Ravinder Singh-i 50m free pistol event kija asaya nung nung gold aser team asaya nung silver medal nguogo.

Bishnah, Jammu & Kashmir nungi arishi küm 29 tain Havildar yagi kanga junga asaya-a point 569 angu, aser South Korea nunger asayar Kim Cheongyong (556) aser Anton Aristarkhov (AIN, 556) na jakdang temaba jenjang nung tembanga liasü.

Ravinder shibai 2023 küm Baku nung World Championships asayaba mapang bronze medal ngua liasü, pai pa indang career nung

tang mezüngbuba goal medal nguogo, koba tang tashi nung pa asoshi takok tajungtiba asütsü.

Asaya mezüngbuba round nung pai point 93 dang angu, saka tanungba round tem nung 98, 94, 95, 93, aser 96 ngua asaya kokogo.

Kasa mapang nung India team nung Ravinder (569), Kamaljeet (540), aser Yogesh Kumar (537) nungeri point 1646 ngua team event nung silver medal nguogo.

Team asaya ya South Korea (1648)-i akok aser tasembuba jenjang nung point 1644 ngua Ukraine team liasü. India team-i South Korea team ya point ana agi dang memenepi liasü.

Ajak senteper team 11 iba mapang bronze medal ngua shilem agia liasü.

BILEMDANGANG

"Temeshi nisung shibai tai makai jajar, pa sülen par chirji tepelatsü".